

# Canllaw i'r Pwyllgor Busnes

Mai 2021

---

Mae'r canllaw hwn yn ymwneud yn benodol â'r Pwyllgor Busnes a'i swyddogaethau.

Mae'n trafod y meysydd a ganlyn:

- Cadeirydd, aelodaeth a chyfarfodydd y Pwyllgor;
- rolau a chyfrifoldebau'r pwyllgor, gyda golwg ar y canlynol: trefn busnes y Senedd; strwythur ac aelodau'r pwyllgorau; deddfwriaeth; cyllidebau; ac arferion a gweithdrefnau cyffredinol y Senedd.



Senedd Cymru yw'r corff sy'n cael ei ethol yn ddemocrataidd i gynrychioli buddiannau Cymru a'i phobl. Mae'r Senedd, fel y'i gelwir, yn deddfu ar gyfer Cymru, yn cytuno ar drethi yng Nghymru, ac yn dwyn Llywodraeth Cymru i gyfrif.

Gallwch weld copi electronig o'r ddogfen hon ar wefan y Senedd Cymru: **[www.senedd.cymru](http://www.senedd.cymru)**

Gellir cael rhagor o gopïau o'r ddogfen hon mewn ffurfiau hygyrch, yn cynnwys Braille, print bras, fersiwn sain a chopïau caled gan:

**Ysgrifenyddiaeth y Siambr  
Senedd Cymru  
Bae Caerdydd  
CF99 1SN**

Ffôn: **0300 200 6565**

© **Hawlfraint Comisiwn y Senedd Cymru 2021**

Ceir atgynhychu testun y ddogfen hon am ddim mewn unrhyw fformat neu gyfrwng cyn belled ag y caiff ei atgynhychu'n gywir ac na chaiff ei ddefnyddio mewn cyd-destun camarweiniol na difriol. Rhaid cydnabod mai Comisiwn y Senedd Cymru sy'n berchen ar hawlfraint y deunydd a rhaid nodi teitl y ddogfen.

## Canllaw i'r Pwyllgor Busnes

**Mae'r canllaw hwn yn ymwneud yn benodol â'r Pwyllgor Busnes a'i swyddogaethau.**

Mae'n trafod y meysydd a ganlyn:

- Cadeirydd, aelodaeth a chyfarfodydd y Pwyllgor;
  - Rolau a chyfrifoldebau'r Pwyllgor, gyda golwg ar y canlynol:
  - Trefn busnes y Senedd;
  - Strwythurau ac aelodaeth pwyllgorau;
  - Deddfwriaeth
  - Cyllidebau
  - Arferion a gweithdrefnau cyffredinol y Senedd.
-

## Cynnwys

A. Cyflwyniad .....	2
B. Cadeirydd, Aelodaeth a chyfarfodydd y Pwyllgor Busnes.....	3
Cadeirydd .....	3
Aelodaeth.....	3
Pleidleisio .....	4
C. Rôl a chyfrifoldebau'r Pwyllgor.....	7
Trefn busnes y Cyfarfod Llawn.....	7
Ystyriaethau eraill sy'n gysylltiedig â threfn busnes y Cyfarfod Llawn.....	11
Strwythurau ac aelodaeth pwyllgorau .....	12
Craffu ar Filiau'r Senedd .....	13
Cydsyniad mewn perthynas â Biliau Senedd y Deyrnas Unedig.....	14
Amserlen ar gyfer ystyried y Gyllideb Flynyddol .....	14
Arferion a gweithdrefnau cyffredinol .....	16
Swyddogaethau achlysurol eraill y Pwyllgor Busnes.....	16

## A. Cyflwyniad

- 1.** Y Pwyllgor Busnes sy'n gyfrifol am drefnu busnes y Senedd. Mae cylch gwaith a swyddogaethau'r Pwyllgor Busnes wedi'u nodi yn y Rheolau Sefydlog. Ei waith yw "hwyluso'r modd o drefnu trafodion y Senedd yn effeithiol", fel y nodir yn Rheol Sefydlog 11.1.
- 2.** Mae'r Pwyllgor yn cael ei gadeirio gan y Llywydd. Ei aelodau eraill yw'r Gweinidog sy'n gyfrifol am fusnes y Llywodraeth, a Rheolwr Busnes pob un o grwpiau gwleidyddol eraill y Senedd. Yn hanesyddol, mae'r Dirprwy Lywydd wedi cael gwahoddiad sefydlog i gyfarfodydd y Pwyllgor.
- 3.** Bydd y Pwyllgor Busnes fel arfer yn cyfarfod unwaith yr wythnos yn ystod yr wythnosau pan fydd y Senedd yn eistedd er mwyn trefnu busnes y Cyfarfod Llawn. Mae ei swyddogaethau eraill yn cynnwys cynnig strwythur a chylchoedd gorchwyl ar gyfer pwyllgorau, cytuno ar amserlenni i bwyllgorau ystyried deddfwriaeth, a gwneud argymhellion ar gyfer arferion a gweithdrefnau cyffredinol y Senedd.

## B. Cadeirydd, Aelodaeth a chyfarfodydd y Pwyllgor Busnes

### Cadeirydd

**4.** Y Llywydd sy'n cadeirio'r Pwyllgor Busnes (Rheol Sefydlog 11.5(i)). Pan na fydd y Llywydd yn bresennol, caiff y Dirprwy Lywydd gadeirio yn unol â Rheol Sefydlog 6.18.

### Aelodaeth

#### Cyffredinol

**5.** Ac eithrio'r Cadeirydd, caiff aelodau eraill y Pwyllgor eu henwebu gan bob grŵp gwleidyddol a gynrychiolir yn y Senedd. Enwebir un aelod o bob grŵp gwleidyddol. Fel arfer, Rheolwyr Busnes y grwpiau fydd y rhain.

**6.** Gall tri neu fwy o Aelodau, nad ydynt yn aelodau o grŵp gwleidyddol, ffurfio grwpiad at ddibenion enwebu un o'i Aelodau i gael ei benodi i'r Pwyllgor Busnes.

**7.** Lle mae nifer yr Aelodau nad ydynt yn aelod o grŵp gwleidyddol yn golygu (ac am y rheswm hwn yn unig) nad ydynt yn gallu ffurfio grŵp gwleidyddol (ac felly nad oes ganddynt gynrychiolydd ar y Pwyllgor Busnes), mae gan bob un o'r cyfryw Aelodau yr hawl i fynychu trafodion y Pwyllgor a chânt bleidleisio (gweler paragraffau 18-23 i gael gwybod mwy am bleidleisio yn y Pwyllgor Busnes).

#### Cynnig i benodi aelodau i'r Pwyllgor

**8.** Cyflwynir y cynnig i benodi aelodau i'r Pwyllgor gan y Gweinidog sy'n gyfrifol am fusnes y Llywodraeth, cyn gynted ag y bo modd ar ôl ei benodi/ei phenodi gan y Prif Weinidog ar ôl etholiad y Senedd (Rheol Sefydlog 11.3). Rhaid i'r cynnig gael cefnogaeth o leiaf ddwy ran o dair o'r Aelodau sy'n pleidleisio. Ni chaniateir cyflwyno gwelliannau i'r cynnig hwn.

**9.** Os na dderbynnir y cynnig, rhaid i'r Gweinidog sy'n gyfrifol am fusnes y Llywodraeth gyflwyno cynnig i bennu maint y Pwyllgor Busnes.

**10.** Yna, byddai lleoedd ar y Pwyllgor yn cael eu dyrannu i grwpiau gwleidyddol er mwyn adlewyrchu eu cynrychiolaeth gyffredinol yn y Senedd, gan ddefnyddio system d'Hondt ar gyfer dyrannu lleoedd ar Bwyllgorau (Atodiad i Reol Sefydlog 17). Yna, byddai pob grŵp gwleidyddol yn penderfynu pa Aelod(au) fyddai'n cynrychioli'r grŵp hwnnw.

## **Dirprwyon**

**11.** Os bydd wedi rhoi rhybudd ymlaen llaw i'r Llywydd, caiff aelod o'r Pwyllgor ei gynrychioli yng nghyfarfod y Pwyllgor Busnes gan aelod arall o'r un grŵp gwleidyddol (Rheol Sefydlog 17.48). Yna, caniateir i'r Aelod a enwebwyd gymryd rhan ym mhob agwedd ar drafodion y Pwyllgor fel pe bai'n aelod ohono (gan gynnwys pleidleisio).

## **Cyfarfodydd**

**12.** Rhaid i'r Pwyllgor Busnes gyfarfod o leiaf unwaith bob pythefnos pan fydd y Senedd yn eistedd (Rheol Sefydlog 11.8).

**13.** Yn hanesyddol, mae'r Pwyllgor Busnes wedi cwrdd yn wythnosol, bob bore Mawrth.

**14.** Gellir cynnal cyfarfodydd y Pwyllgor Busnes yn gyhoeddus neu'n breifat (Rheol Sefydlog 17.42). Serch hynny, bydd fel arfer yn cyfarfod yn breifat er mwyn trafod trefn busnes.

**15.** Mae'r Pwyllgor Busnes yn cyhoeddi agenda a chofnodion pob cyfarfod ar dudalennau rhyngrwyd y Senedd. Caiff yr agenda ei gyhoeddi fel arfer ar y dydd Gwener cyn y cyfarfod, a'r cofnodion wythnos wedyn. Ni chyhoeddir papurau preifat.

**16.** Bydd trafodion y Pwyllgor Busnes yn cael eu hwyluso gan Ysgrifenyddiaeth y Pwyllgor Busnes sy'n dosbarthu'r papurau perthnasol ddau ddiwrnod gwaith cyn pob cyfarfod. Clerc y Pwyllgor Busnes yw Pennaeth Ysgrifenyddiaeth y Siambr. Bydd uwch-swyddogion eraill y Senedd a'r Llywodraeth yn bresennol i gynghori'r Aelodau.

**17.** Oni nodir yn wahanol yn y Rheolau Sefydlog, bydd y Pwyllgor Busnes, fel un o Bwyllgorau'r Senedd, yn cadw at Reol Sefydlog 17; gweithredu Pwyllgorau.

## **Pleidleisio**

**18.** Fel arfer, bydd y Pwyllgor Busnes yn gweithredu drwy gonsensws a, lle y bo modd, bydd yn penderfynu ar faterion heb orfod pleidleisio. Os bydd angen pleidlais ffurfiol, bydd yn ofynnol i'r Pwyllgor Busnes, yn ôl y Rheolau Sefydlog, gadw at y gweithdrefnau isod.

## Y cadeirydd

**19.** Dim ond pan fydd angen defnyddio pleidlais fwrw (ar wahân i'r eithriad a amlinellir ym mharagraff 22 isod) y caiff y cadeirydd bleidleisio. Os bydd angen defnyddio pleidlais fwrw, rhaid i'r cadeirydd bleidleisio:

- i. o blaid, os oes modd trafod ymhellach;
- ii. yn erbyn, os nad oes modd trafod ymhellach.

## Pleidleisio wedi'i bwysoli

**20.** Yn wahanol i'r drefn bleidleisio mewn pwyllgorau eraill, bydd pleidleisio yn y Pwyllgor Busnes yn cael ei bwysoli yn ôl maint y grŵp gwleidyddol y mae pob un o'r aelodau'n ei gynrychioli.

**21.** Bydd gan yr holl aelodau o'r Pwyllgor (ac eithrio'r cadeirydd) un bleidlais ar gyfer pob aelod o'r grŵp (neu'r grwpiad) gwleidyddol y mae'n ei gynrychioli. Mae'r Llywydd a'r Dirprwy Lywydd yn cael eu cynnwys at ddibenion cyfrif nifer yr aelodau sydd mewn grŵp (neu grwpiad).

**22.** Bydd gan bob aelod nad yw'n aelod o grŵp (neu, am resymau rhifyddol, grwpiad) gwleidyddol yr hawl i fynd i drafodion y Pwyllgor a phleidleisio. Os nad yw'r cadeirydd yn aelod o grŵp (neu grwpiad) gwleidyddol, caiff bleidleisio yn unigol yn ogystal â chael y bleidlais fwrw.

### *Enghraifft A: Pleidleisio wedi'i bwysoli*

<b>Grŵp gwleidyddol</b>	<b>Nifer yr Aelodau o'r Senedd</b>	<b>Nifer y pleidleisiau sydd gan gynrychiolydd y grŵp ar y Pwyllgor Busnes</b>
<b>A</b>	30 o Aelodau  (gan gynnwys y Llywydd ac 11 aelod o'r Llywodraeth)	30
<b>B</b>	15 o Aelodau	15
<b>C</b>	10 o Aelodau	10
<b>D</b>	5 Aelod (gan gynnwys y Dirprwy Lywydd)	5



## Pleidleisio cymwysedig wedi'i bwysoli

**23.** Bydd rhai penderfyniadau penodol a wneir gan y Pwyllgor Busnes yn dilyn y drefn "pleidleisio cymwysedig wedi'i bwysoli" o dan Reol Sefydlog 11.5(iv). Felly, os bydd aelod o'r Pwyllgor yn cynrychioli grŵp (neu grwpiad) gwleidyddol sydd â rôl weithredol, bydd nifer y pleidleisiau sydd gan yr aelod hwnnw / honno yn cael ei gostwng yn unol â nifer yr aelodau yn ei grŵp sydd hefyd yn aelodau o'r Llywodraeth. Defnyddir y drefn hon pan fydd y Pwyllgor yn penderfynu ar drefn busnes y Senedd yn y Cyfarfod Llawn ac yn cynnig enwau a chylchoedd gwaith pwyllgorau.

*Enghraifft B: Pleidleisio cymwysedig wedi'i bwysoli*

<b>Grŵp gwleidyddol</b>	<b>Nifer yr Aelodau o'r Senedd</b>	<b>Nifer y pleidleisiau sydd gan gynrychiolydd y grŵp ar y Pwyllgor Busnes</b>
<b>A</b>	30 (gan gynnwys y Llywydd ac 11 aelod o'r Llywodraeth)	19
<b>B</b>	15	15
<b>C</b>	10	10
<b>D</b>	5 (gan gynnwys y Dirprwy Lywydd)	5

## C. Rôl a chyfrifoldebau'r Pwyllgor

**24.** Rôl y Pwyllgor Busnes yw “hwyluso'r modd o drefnu trafodion y Senedd yn effeithiol” fel y nodir yn Rheol Sefydlog 11.1. Yn hynny o beth, mae ei rôl yn un eang.

**25.** Rhestrir prif gyfrifoldebau'r Pwyllgor Busnes yn Rheol Sefydlog 11.7 ac maent yn cynnwys:

- gwneud sylwadau ar y cynigion ar gyfer trefnu busnes y Llywodraeth yn y Cyfarfod Llawn;
- trefnu busnes y Senedd yn y Cyfarfod Llawn;
- cynnig enwau a chylchoedd gwaith y pwyllgorau;
- gwneud argymhellion ynglŷn ag arferion a gweithdrefnau cyffredinol y Senedd wrth gynnal ei fusnes; ac
- ymgymryd â'r swyddogaethau a neilltuwyd i'r Pwyllgor mewn manau eraill yn y Rheolau Sefydlog, gan gynnwys cytuno ar amserlen y Senedd a'r amserlenni ar gyfer ystyried Biliau, a'u cyhoeddi.

### Trefn busnes y Cyfarfod Llawn

**26.** Prif swyddogaeth y Pwyllgor Busnes yw cynnig sylwadau ar drefn busnes y Cyfarfod Llawn a chytuno ar y drefn honno a bydd yn gwneud hynny bob wythnos ar gyfer y tair wythnos ganlynol (gweler paragraffau 38 i 42). Er mwyn hwyluso blaengynllunio a sefydlu patrwm rheolaidd ar gyfer busnes y Cyfarfod Llawn, y Pwyllgor hefyd sy'n gyfrifol am gytuno ar Amserlen y Senedd.

### Amserlen y Senedd

**27.** Mae amserlen y Senedd yn darparu fframwaith cyffredinol ar gyfer defnyddio amser y Senedd, am gyfnodau heb fod yn llai na chwe mis. Rhaid i'r Pwyllgor Busnes gyhoeddi amserlen, o dro i dro (Rheol Sefydlog 11.9), sydd:

- yn amlinellu amserlenni'r Cyfarfod Llawn;
- yn pennu'r amseroedd sydd ar gael ar gyfer cyfarfodydd pwyllgorau;
- yn pennu'r amseroedd sydd ar gael ar gyfer cyfarfodydd grwpiau gwleidyddol;

- yn amlinellu dyddiadau toriadau; ac
- yn amlinellu dyddiadau ar gyfer cwestiynau i'w hateb ar lafar gan y Prif Weinidog, Gweinidogion Cymru, y Cwnsler Cyffredinol a Chomisiwn y Senedd.

**28.** Wrth lunio'r amserlen, rhaid i'r Pwyllgor ystyried cyfrifoldebau teuluol ac etholaethol/rhanbarthol yr Aelodau, a'u trefniadau teithio tebygol (Rheol Sefydlog 11.10), ac felly dylai geisio peidio ag amserlennu busnes cyn 9.00am ac ar ôl 6.00pm.

**29.** Yn unol â'r Rheolau Sefydlog, bydd gan y Pwyllgor Busnes yr hyblygrwydd i benderfynu pryd, o fewn y ffiniau a bennir yn Amserlen y Senedd, y ceir trafod categorïau gwahanol o fusnes y Cyfarfod Llawn. Rhoddir yr hyblygrwydd hwn er mwyn sicrhau bod y Pwyllgor yn gallu ymateb i ofynion busnes. Un enghraifft o'r hyblygrwydd hwn yw caniatáu i'r Pwyllgor Busnes benderfynu'n gyffredinol y drefn ar gyfer categorïau gwahanol o fusnes yn y Cyfarfod Llawn, er bod rhaid trafod eitemau'r Llywodraeth yn gyntaf "fel arfer" (Rheol Sefydlog 12.6(ii)).

**30.** Rhaid i'r Pwyllgor hefyd bennu pa mor aml y cynhelir rhai mathau o fusnes megis Dadl Fer, dadleuon ar gynigion a gyflwynir gan Aelodau, dadleuon ar gynigion deddfwriaethol Aelodau a pha mor aml y cynhelir balotau cysylltiedig i benderfynu ar enw'r Aelod neu'r Aelodau sy'n cael cyflwyno busnes o'r fath.

### **Categoriâu o fusnes yn y Cyfarfod Llawn**

**31.** Mae Rheol Sefydlog 11 yn diffinio'r ddau gategori o fusnes yn y Cyfarfod Llawn: busnes y Llywodraeth a busnes y Senedd. Mae gan y Pwyllgor Busnes rôl gynghori mewn perthynas â busnes y Llywodraeth; mewn perthynas â busnes y Senedd, mae ganddo rôl gwneud penderfyniadau.

### **Busnes y Llywodraeth**

**32.** Bydd busnes y Llywodraeth yn y Cyfarfod Llawn, gan gynnwys faint o amser sydd i'w neilltuo i eitem, yn cael ei benderfynu gan y Llywodraeth (Rheol Sefydlog 11.12). Fe'i cyflwynir i'r Pwyllgor Busnes gan y Gweinidog sy'n gyfrifol am fusnes y Llywodraeth. Rôl y Pwyllgor Busnes fydd cynnig sylwadau (nid penderfynu na chytuno) ar drefn busnes y Llywodraeth.

**33.** Caiff y Llywodraeth benderfynu newid ei busnes ar sail sylwadau gan Reolwyr Busnes eraill. Fodd bynnag, mater i'r Llywodraeth yw hwn.

**34.** Mae busnes y Llywodraeth yn cynnwys trafodion am y canlynol (Rheol Sefydlog 11.18):

- cwestiynau llafar (ac eithrio cwestiynau llafar i'r Comisiwn);
- unrhyw ddadl frys a gynigir gan un o aelodau'r Llywodraeth;<sup>1</sup>
- datganiadau gan aelod o'r Llywodraeth;
- deddfwriaeth lle bydd yr Aelod sy'n gyfrifol am y ddeddfwriaeth yn aelod o'r Llywodraeth; ac
- unrhyw gynnig a gyflwynir gan aelod o'r Llywodraeth.

### **Busnes y Senedd**

**35.** Y Pwyllgor Busnes sydd i benderfynu ar fusnes y Senedd a drafodir yn y Cyfarfod Llawn, yn unol â gofynion Rheolau Sefydlog 11.7(ii) ac 11.13. Y Pwyllgor Busnes sy'n gyfrifol am benderfynu a ddylid neilltuo amser penodol i eitem o fusnes y Senedd yn y Cyfarfod Llawn ac, os felly, faint o amser y dylid ei neilltuo iddi.

**36.** Os nad oes modd sicrhau cytundeb drwy gonsensws, rhaid gwneud unrhyw benderfyniad am fusnes y Senedd drwy ddefnyddio pleidleisio cymwysedig wedi'i bwysoli, yn unol â Rheol Sefydlog 11.5(iv). Ceir rhagor o wybodaeth am bleidleisio cymwysedig wedi'i bwysoli ym mharagraff 23.

**37.** Mae busnes y Senedd yn cynnwys pob eitem o fusnes ac eithrio'r rhai a restrir ym mharagraff 34. Er enghraifft, trafodion sy'n ymwneud â'r canlynol:

- cwestiynau llafar i Gomisiwn y Senedd;
- adroddiadau pwyllgorau;
- deddfwriaeth lle na fydd yr Aelod sy'n gyfrifol am y ddeddfwriaeth yn aelod o'r Llywodraeth;
- Dadl Fer; ac
- unrhyw gynnig a gyflwynir gan Aelod nad yw'n aelod o'r Llywodraeth.

---

<sup>1</sup> Ystyr "aelod o'r Llywodraeth" yw'r Prif Weinidog, un o Weinidogion Cymru, y Cwnsler Cyffredinol neu un o Ddirprwy Weinidogion Cymru.

## Datganiad a Chyhoeddiad Busnes

**38.** Bydd y Pwyllgor Busnes yn ystyried trefn y busnes bob wythnos. Mae hyn yn cynnwys ystyried:

- 'Busnes yr wythnos hon' - dogfen sy'n cynnwys busnes y Llywodraeth a busnes y Senedd ar gyfer yr wythnos galendr honno;
- amserlen 3 wythnos busnes y Llywodraeth, a gyflwynir gan y Llywodraeth, yn dechrau o'r wythnos eistedd ganlynol; ac
- amserlen 3 wythnos busnes y Senedd, a baratoir gan Ysgrifenyddiaeth y Pwyllgor Busnes, yn dechrau o'r wythnos eistedd ganlynol.

**39.** Bob wythnos y bydd y Senedd yn eistedd yn y Cyfarfod Llawn, bydd y Gweinidog sy'n gyfrifol am fusnes y Llywodraeth yn gwneud datganiad yn y Cyfarfod Llawn am drefn busnes y Llywodraeth, yn ogystal â chyhoeddi trefn busnes y Senedd. Gelwir hyn yn Datganiad a Chyhoeddiad Busnes.

**40.** Rhaid gwneud y Datganiad a Chyhoeddiad Busnes bob wythnos y bydd y Senedd yn cyfarfod yn y Cyfarfod Llawn (Rheol Sefydlog 11.11). Rhaid iddo restru'r busnes ar gyfer yr wythnos ganlynol (a hon fydd sail Agenda'r Cyfarfod Llawn) a'r drefn dros dro ar gyfer busnes y ddwy wythnos ganlynol.

**41.** Caniateir i Aelodau ofyn cwestiynau am y Datganiad Busnes. Mae hyn yn gyfle i Aelodau wneud cais i'r Llywodraeth wneud datganiad neu gynnal dadl yn y Siambr ar fater sydd o bwys i'r Aelod.

**42.** Bydd y Datganiad a Chyhoeddiad Busnes yn cael ei wneud fel datganiad llafar yn y Cyfarfod Llawn a bydd ar gael hefyd ar wefan y Senedd. Ceir linc i'r datganiad yn agenda berthnasol pob Cyfarfod Llawn hefyd.

## Y cyfnod pleidleisio

**43.** Bydd y Pwyllgor Busnes yn cytuno ar y "Cyfnod Pleidleisio" ar gyfer pob Cyfarfod Llawn yn ei gyfarfod wythnosol.<sup>2</sup> Fel arfer, bydd ar adeg neu bwynt ar agenda'r un diwrnod, a gynhelir ar ôl holl bleidleisiau angenrheidiol y diwrnod.<sup>3</sup>

---

<sup>2</sup>Yn ôl Rheol Sefydlog 11.15, y Llywodraeth sy'n penderfynu pryd y cynhelir pleidleisiau ar ei busnes, a'r Pwyllgor Busnes sy'n penderfynu pryd y cynhelir pleidleisiau ar fusnes y Senedd. Yr hyn sy'n arferol yw y cynhelir pleidleisiau ar fusnes y Senedd a busnes y Llywodraeth yn ystod yr un "Cyfnod Pleidleisio".

<sup>3</sup>Ar gyfer trafodion Cyfnod 3 (neu'r Cyfnod Adrodd) pan fydd y Senedd yn ystyried gwelliannau i Fil, cynhelir pleidleisiau yn ystod trafodion y Cyfarfod Llawn, ac ni chaniateir eu gohirio tan y cyfnod pleidleisio. Mae cynsail wedi'i gosod i bleidleisio ar bob eitem arall o fusnes cyn dechrau trafodion Cyfnod 3.

**44.** O bryd i'w gilydd gellir gwneud penderfyniadau (neu gynnal pleidleisiau) ar gynigion a gwelliannau yn y Cyfarfod Llawn yn syth ar ôl iddynt gael eu trafod. Gellir cytuno ar gynigion neu welliannau heb eu trafod ar ddiwedd y trafodion ar yr eitem honno o fusnes (h.y. nid oes aelod wedi gwrthwynebu cytuno arnynt). Fodd bynnag, os bydd Aelod yn gwrthwynebu, fel arfer caiff pleidleisiau angenrheidiol eu gohirio tan y "Cyfnod Pleidleisio".

**45.** Caiff y Pwyllgor Busnes hefyd benderfynu, yn unol â Rheol Sefydlog 11.15(ii), na fydd eitem o fusnes y cyfeirir ati yn y Datganiad a Chyhoeddiad Busnes yn gymwys i gytuno arni heb ei thrafod. Os penderfynir hynny, bydd y Pwyllgor Senedd yn dyrannu amser neu bwynt yn ystod busnes Cyfarfod Llawn y dydd pan fydd y bleidlais berthnasol i'w chynnal. Caiff yr amser hwn ei nodi ar Agenda'r Cyfarfod Llawn cyn y cyfarfod.

### **Atal y Rheolau Sefydlog dros dro er mwyn cynnwys eitemau o fusnes yn y Cyfarfod Llawn**

**46.** O bryd i'w gilydd, mae'n bosibl y caiff y Pwyllgor Busnes geisiadau i atal y Rheolau Sefydlog dros dro er mwyn cynnwys eitemau o fusnes nad ydynt wedi ymddangos cyn hynny ar y Datganiad a Chyhoeddiad Busnes. Fel arfer, y rheswm dros hyn yw mai eitemau o fusnes heb eu rhagweld yw'r rhain ac mae angen ymdrin â hwy cyn gynted â phosibl ond, o dan amgylchiadau arferol, bydd angen rhoi rhybudd yn eu cylch ymlaen llaw.

**47.** Er y caiff unrhyw Aelod gyflwyno cynnig i atal y Rheolau Sefydlog dros dro, mae unrhyw gynig i atal y Rheolau Sefydlog at y diben hwn fel arfer yn cael ei gytuno yn gyntaf gan y Pwyllgor Busnes, gyda chynnig i atal Busnes y Senedd yn cael ei gyflwyno yn enw'r Llywydd, a chyda chynigion i atal busnes y Llywodraeth yn cael eu cyflwyno gan un o Weinidogion y Llywodraeth.

### **Ystyriaethau eraill sy'n gysylltiedig â threfn busnes y Cyfarfod Llawn**

#### **Neilltuo amser ar gyfer categorïau o fusnes y Cyfarfod Llawn**

**48.** Mae Rheol Sefydlog 11.17 yn dweud, mewn blwyddyn seneddol, fod yn rhaid cadw at y gymhareb 3:2 wrth rannu cyfanswm yr amser sydd ar gael ar gyfer busnes y Llywodraeth a busnes y Senedd, yn y drefn honno. Mater i'r Pwyllgor Busnes yw sicrhau'r cydbwysedd hwn.

## Diogelu eitemau busnes penodol yn y Cyfarfod Llawn

**49.** Yn unol â Rheol Sefydlog 11.21, rhaid i'r Pwyllgor Busnes neilltuo amser ym mhob un o flynyddoedd y Senedd i drafod yr eitemau o fusnes a ganlyn yn y Cyfarfod Llawn:

- polisi a rhaglen deddfwriaethol Llywodraeth Cymru;
- dadleuon y gwrthbleidiau;
- dadleuon a gynigir gan Aelodau nad ydynt yn Weinidogion;
- dadleuon am adroddiadau pwyllgorau;
- Dadl Fer; a
- deddfwriaeth a gynigir gan Aelodau.

## Strwythurau ac aelodaeth pwyllgorau

**50.** Y Pwyllgor Busnes sy'n gyfrifol am gynnig enwau a chylchoedd gwaith pwyllgorau'r Senedd (Rheol Sefydlog 16). Rhaid iddo wneud hynny cyn gynted â phosibl ar ôl etholiad cyffredinol y Senedd. Mae hefyd yn gyfrifol am gyflwyno cynigion sy'n ymwneud ag aelodaeth a chadeiryddion pwyllgorau (Rheolau Sefydlog 17.2 - 17.16).

**51.** Wrth gynnig strwythur y pwyllgorau, rhaid i'r Pwyllgor Busnes sicrhau ei fod yn bodloni gofynion penodol a bod pwyllgorau cyfrifol i ymgymryd â swyddogaethau allweddol a nodir yn y Rheolau Sefydlog. Rhaid iddo sicrhau:

- bod pob un o feysydd cyfrifoldeb y Llywodraeth a'r cyrff cyhoeddus cysylltiedig yn destun gwaith craffu gan bwyllgor neu bwyllgorau (Rheol Sefydlog 16.4(i));
- bod pob mater sy'n ymwneud â chymhwysedd deddfwriaethol y Senedd a swyddogaethau Gweinidogion Cymru a'r Cwnsler Cyffredinol yn destun gwaith craffu gan bwyllgor neu bwyllgorau (Rheol Sefydlog 16.4(ii); a
- bod cydbwysedd cyffredinol, pan fo hynny'n rhesymol ymarferol, rhwng gweithredu'r cyfrifoldebau i:
  - iii. archwilio gwariant, gweinyddiaeth a pholisi'r Llywodraeth a chyrrff cyhoeddus cysylltiedig; ac

iv. archwilio deddfwriaeth (Rheol Sefydlog 16.4(iii)).

**52.** Caiff y Pwyllgor Busnes gyflwyno cynnig i newid nifer, enw neu gylch gorchwyl unrhyw bwyllgor yn ystod oes Senedd os yw'n ymddangos bod angen gwneud hynny (Rheol Sefydlog 16.3).

**53.** Rhaid i'r Senedd hefyd ystyried cynnig a gyflwynir gan y Pwyllgor Busnes i gytuno ar ddyrannu cadeiryddiaeth i grwpiau ac aelodaeth pob pwyllgor. Wrth gyflwyno'r cynigion hyn, rhaid i'r Pwyllgor Busnes sicrhau:

- bod cydbwysedd y cadeiryddion ar draws y pwyllgorau'n adlewyrchu'r grwpiau gwleidyddol y mae'r Aelodau'n perthyn iddynt;
- lle bo hynny'n rhesymol ymarferol, y cynigir lle i bob Aelod nad yw'n perthyn i grŵp gwleidyddol ar o leiaf un pwyllgor; a
- lle bo hynny'n rhesymol ymarferol, y bydd cyfanswm y lleoedd a neilltuir ar bwyllgorau i Aelodau sy'n perthyn i bob grŵp gwleidyddol o leiaf gynifer â nifer yr Aelodau sy'n perthyn i'r grŵp gwleidyddol hwnnw.

**54.** Yn ymarferol, y grwpiau gwleidyddol sy'n rhoi gwybod i'r Pwyllgor Busnes pa Aelodau fydd yn eu cynrychioli ar bob pwyllgor y mae ganddynt le arno.

**55.** Pan ddaw lle'n wag ar bwyllgor, rhaid i'r Pwyllgor Busnes ystyried pa effaith y gallai hyn ei chael ar aelodaeth y pwyllgor hwnnw, ac ar aelodaeth unrhyw bwyllgor arall. Yn sgil hynny, rhaid iddo ystyried a oes angen cyflwyno cynnig sy'n argymhell newid aelodaeth unrhyw rai o bwyllgorau'r Senedd.

## **Craffu ar Filiau'r Senedd**

### **Amserlennu**

**56.** Y Pwyllgor Busnes sy'n gyfrifol am gyhoeddi'r amserlen ar gyfer unrhyw drafodaethau ar Fil gan bwyllgor. Penderfynir ar ddyddiadau'r cyfnodau yn y Cyfarfod Llawn (h.y. dadl Cyfnod 1 ar egwyddorion cyffredinol y Bil neu drafodion Cyfnod 3 ar welliannau iddo) (Rheol Sefydlog 26.7) fel rhan o ystyriaeth arferol y Pwyllgor o drefn busnes y Cyfarfod Llawn, gyda'r Pwyllgor yn penderfynu ar amserlennu Biliau nad ydynt yn Filiau'r Llywodraeth, a'r Llywodraeth yn trefnu Biliau'r Llywodraeth.

**57.** Yn ymarferol, ar ôl cyflwyno Bil, neu ychydig cyn hynny, bydd yr Aelod sy'n gyfrifol yn ysgrifennu at y Pwyllgor Busnes i gynnig amserlen ar gyfer cyfnodau pwyllgor:



- Cyfnod 1: y dyddiad cau ar gyfer cyflwyno adroddiad ar egwyddorion cyffredinol y Bil gan bwyllgor;
- Cyfnod 2: y dyddiad cau dros dro i bwyllgor orffen ei ystyriaeth fanwl o unrhyw welliannau a gyflwynwyd i'r Bil (yn amodol ar y Senedd yn cytuno ar egwyddorion cyffredinol y Bil yng Nghyfnod 1).

**58.** Cyn cytuno ar yr amserlen, bydd y Pwyllgor Busnes yn ymgynghori â'r pwyllgor cyfrifol arfaethedig ynghylch yr amserlen. Caiff y Pwyllgor Busnes newid yr amserlen wedyn, fel y mae'n ystyried sy'n briodol, ond rhaid iddo roi rhesymau am newidiadau o'r fath. Rhaid cyhoeddi'r amserlen, a newidiadau dilynol iddi, ar wefan y Senedd.

**59.** Ceir rhagor o wybodaeth am y broses ddeddfwriaethol ar y tudalennau deddfwriaeth ar wefan y Senedd.

## **Cydsyniad mewn perthynas â Biliau Senedd y Deyrnas Unedig**

**60.** Pan fydd Senedd y DU yn dymuno deddfu ar bwnc sydd wedi'i ddatganoli i'r Senedd, yn ôl y confensiwn, mae'n ofynnol iddi gael cydsyniad y Senedd cyn pasio'r ddeddfwriaeth dan sylw. Rhoddir cydsyniad o'r fath drwy gytuno ar Gynnig Cydsyniad Deddfwriaethol. Yn ôl Rheol Sefydlog 29, rhaid gosod memorandwm cydsyniad deddfwriaethol i roi gwybodaeth am Fil perthnasol Senedd y DU ac i hwyluso'r Senedd i ystyried y cynnig cydsyniad deddfwriaethol.

**61.** Yn unol â Rheol Sefydlog 29.4, caiff y Pwyllgor Busnes gyfeirio unrhyw femorandwm cydsyniad deddfwriaethol at bwyllgor neu bwyllgorau i'w ystyried cyn i'r Senedd ei drafod (Rheol Sefydlog 29.4).

**62.** Os caiff memorandwm cydsyniad deddfwriaethol ei gyfeirio at bwyllgor neu bwyllgorau i'w ystyried, rhaid i'r Pwyllgor Busnes bennu a chyhoeddi amserlen i'r pwyllgor, neu'r pwyllgorau, ei ystyried a chyflwyno adroddiad arno.

## **Amserlen ar gyfer ystyried y Gyllideb Flynyddol**

**63.** Mae'n ofynnol i'r Senedd ystyried Cynnig y Gyllideb Flynyddol bob blwyddyn, fel arfer ar ddiwedd tymor yr hydref. Mae'r broses yn cynnwys cynnig i gytuno ar gyllidebau terfynol y Llywodraeth a'r Comisiwn, ac amcangyfrifon Archwilydd Cyffredinol Cymru ac Ombwdsmon Gwasanaethau Cyhoeddus Cymru. Y Pwyllgor Busnes sy'n gyfrifol am gyhoeddi'r amserlen ar gyfer ystyried cyllideb ddrafft y Llywodraeth a'r dyddiad pan gaiff Cynnig y Gyllideb Flynyddol ei gyflwyno.

## **Cyllideb y Llywodraeth**

- 64.** Fel arfer, cyhoeddir yr amserlen ar gyfer ystyried cyllideb ddrafft y Llywodraeth gan y Pwyllgor Busnes yn fuan ar ôl toriad yr haf, drwy ymgynghori â'r Llywodraeth a'r pwyllgor sy'n gyfrifol am gyflawni'r swyddogaeth craffu ariannol.
- 65.** Bydd hyn yn rhoi digon o rybudd i'r pwyllgorau gynllunio'u proses graffu o fewn yr amser sydd wedi'i neilltuo.
- 66.** Mae'r amserlen yn cynnwys:
- erbyn pa ddyddiad y bydd un o Weinidogion Cymru yn cyhoeddi cynigion amlinellol a manwl ar gyfer cyllideb ddrafft y Llywodraeth, yn unol â'r hysbysiad a roddwyd i'r Pwyllgor Busnes gan y Gweinidog sy'n gyfrifol am fusnes y Llywodraeth; ac
  - erbyn pa derfyn amser y mae'n rhaid i'r pwyllgor cyfrifol gyflwyno adroddiad i'r Senedd ar y cynigion amlinellol ar gyfer y Llywodraeth. Mae'r Pwyllgor Busnes yn pennu'r terfyn amser hwn ond, fel arfer, rhaid rhoi o leiaf 8 wythnos i'r pwyllgor sy'n gyfrifol am gyllid gyflwyno adroddiad ar y cynigion cyllideb amlinellol, a rhaid rhoi o leiaf 5 wythnos bob amser iddo gyflwyno adroddiad, a rhaid rhoi o leiaf 5 wythnos i'r pwyllgorau eraill ystyried cynigion manwl y gyllideb;
  - erbyn pa ddyddiad y bydd un o Weinidogion Cymru yn cyflwyno cynnig y gyllideb flynyddol, yn unol â'r hysbysiad a roddwyd i'r Pwyllgor Busnes gan y Gweinidog sy'n gyfrifol am fusnes y Llywodraeth.
- 67.** Ar gais y Gweinidog sy'n gyfrifol am fusnes y Llywodraeth, caiff y Pwyllgor Busnes wedyn newid yr amserlen a gyhoeddwyd (Rheol Sefydlog 20.6). Rhaid i'r Pwyllgor Busnes gyhoeddi'r amserlen ddiwygiedig.

## **Cyllideb y Comisiwn**

- 68.** Os bydd adolygiad o wariant Llywodraeth y Deyrnas Unedig neu Lywodraeth Cymru, caiff y Pwyllgor Busnes gytuno i gais gan y Comisiwn i bennu dyddiadau gwahanol ar gyfer gosod cyllideb ddrafft y Comisiwn (Rheol Sefydlog 20.20).
- 69.** Os bydd y Pwyllgor Busnes yn cytuno i newid, rhaid iddo hysbysu'r Senedd drwy osod adroddiad.

## Arferion a gweithdrefnau cyffredinol

**70.** Mae gan y Pwyllgor Busnes rôl weithdrefnol bwysig hefyd, ac mae'r Rheolau Sefydlog yn fodd i'r Pwyllgor wneud argymhellion am arferion a gweithdrefnau cyffredinol y Senedd.

**71.** Mae Rheol Sefydlog 33 yn caniatáu i'r Pwyllgor Busnes argymhell newidiadau i'r Rheolau Sefydlog, fel y'u rhestrir isod. Mae'r Pwyllgor hefyd yn gyfrifol am ystyried materion gweithdrefnol eraill sy'n codi o ganlyniad i ystyried newid y Rheolau Sefydlog.

**72.** Ar ben hynny, mae'n bosibl y bydd y Llywydd, drwy ymgynghori â'r Pwyllgor Busnes, yn rhoi canllawiau ysgrifenedig i'r Aelodau ar gynnal trafodion y Senedd yn y modd priodol (Rheol Sefydlog 6.17). Cyhoeddwyd y 'Canllawiau' hyn gyntaf ar 4 Mehefin 2019, ac maent yn cael eu diweddarau'n rheolaidd.

## Ail-wneud a diwygio'r Rheolau Sefydlog

**73.** Dim ond y Pwyllgor Busnes sy'n cael cyflwyno cynnig i ail-wneud neu ddiwygio'r Rheolau Sefydlog (Rheol Sefydlog 33.2).

**74.** Fodd bynnag, os bydd o leiaf chwe Aelod yn cynnig i'r Pwyllgor Busnes y dylid ail-wneud neu ddiwygio'r Rheolau Sefydlog, rhaid i'r Pwyllgor Busnes ystyried y cynnig a chyflwyno adroddiad ar y cynnig o fewn amser rhesymol (Rheol Sefydlog 33.1).

## Swyddogaethau achlysurol eraill y Pwyllgor Busnes

### Comisiwn y Senedd

**75.** Y Pwyllgor Busnes sy'n gyfrifol am gyflwyno cynigion sy'n gysylltiedig ag aelodaeth Comisiwn y Senedd. Cyn gynted ag y bo modd ar ôl etholiad cyffredinol y Senedd, rhaid i'r Senedd ystyried cynnig gan y Pwyllgor Busnes sy'n cynnig enwau'r pedwar Aelod sydd i'w penodi'n aelodau o Gomisiwn y Senedd (Rheol Sefydlog 7.1).

**76.** Cyfrifoldeb y pedair plaid wleidyddol fwyaf yw hysbysu'r Pwyllgor am enw'r Aelod sydd i'w gynnwys yn y cynnig, ond, os oes llai na phedwar grŵp gwleidyddol, mater i'r Pwyllgor Busnes fydd enwi unrhyw Aelod(au) ychwanegol.

**77.** Os bydd Aelod yn cyflwyno cynnig i roi cyfarwyddyd arbennig neu gyffredinol i'r Comisiwn o dan Reol Sefydlog 7.11, rhaid i'r Pwyllgor Busnes gyflwyno adroddiad ynghylch a ddylid neilltuo amser i drafod cynnig o'r fath.

### **Gweithdrefn arbennig y Senedd**

**78.** Os bydd y Llywydd yn dweud wrth y Senedd fod yn rhaid ystyried deiseb yng nghyswllt is-ddeddfwriaeth o dan weithdrefn arbennig y Senedd, rhaid i'r Pwyllgor Busnes gyfeirio deiseb (a gwrth-ddeiseb) o'r fath at bwyllgor i'w hystyried a chyflwyno adroddiad yn ei chylch (Rheol Sefydlog 28).